

四庫全書

集部

欽定四庫全書

靜思集卷四

元 郭鈺 撰

七言古

送劉掾歸休

人生無如食祿好何似逢萌挂冠早山林朝市將無同  
英雄不向塵中老聞君拂衣歸故林往事欲說誰知心  
一代文章塵土夢百年富貴浮雲陰君今住近青原下  
庭竹窻梅絕瀟灑幾回清夜夢故人故人天上騎驄馬

丹心仰天寒水清白髮照鏡秋霜明曉圓鋤雲種蒼玉  
春山斷雨尋黃精瓜田新得東陵種襟期還與東陵共  
門前賓客從去來但令玄鶴司迎送我不識君心煩勞  
滿前出處君獨高側身西望長歎息懸崖老樹風蕭騷

座客談仙

彩霞麗空覆蓬島瑤樓畫鎖春風好海波不動羽輪輕  
霞佩雲裾自顛倒徐郎消息真未真如何却許童男到  
一盃曉露嚙瓊漿兩袂天香拾瑤草不省仙宮日月長

但憑青鳥歸來早  
秦皇漢武空復情  
蕭颺麻姑霜鬢老  
送羅秀賓之江東兼寄劉潤芳兄弟

劉於余為近隣而客於饒與吾家諸父兄弟  
俱相好壬辰之後久不知消息近年聞無恙  
而故鄉有不堪回首者故章末特致意云

十載山中投禿筆  
長揮老淚送行役  
今日緣君始放懷  
為作長歌寫胸臆  
君昔讀書三百篇  
早期擢桂秋風前  
驂騑健步無由騁  
白鶴仙經得秘傳  
竹筇行遍吳雲白

地利天時細窺測丹心欲拯世間貧厚澤每沾泉下客  
辭家千里遊江東壯年豪氣飛晴虹大府禁酷若為別  
奉一盃水情無窮吾鄉劉郎好兄弟為我殷勤致深意  
芳草烟荒同水廬長松月冷龍湖地東郭老生廢讀書  
桂林雖好顏色無人生萬事還鄉好晝錦何時照里閭  
楊和吉西雲亭賞菊和韻

西雲亭上酒初熟西雲亭下滿秋菊主翁把菊飛酒觴  
綵箋自寫陽春曲舊觀菊譜不知名今日按行心始足

靚妝洗粉舞霓裳醉色扶嬌剪紅玉就中一種菊之王  
高花獨號御袍黃縹緲翠華下南苑玉環飛燕參翱翔  
誰言老圃含淒涼雅懷不受春花香地偏佳色承曉露  
天清老氣排秋霜府司伐木震山海嗟爾寒花獨光彩  
長歌把酒酹淵明歸來三徑今何在座客酒酣多氣概  
我獨看花發長慨晚歲更為松竹期他時莫逐蕭蘭改

桐江宴集和周子諒韻

岸巾長嘯吾與君讓君筆力飛春雲簾葭枯折吳江濱

芝蘭却許濃香薰今夕何夕歌聲聞江山重到吾已老  
慙愧詩成瘦如島座中少年美詞藻琪樹交花照晴昊  
懷抱一時盡傾倒玉瓶行酒杯如飛爭雄得雋酒滿衣  
持觥御史令莫違斫魚烹雁臚指揮荊州吾土還相依  
江上雲荒月欲爛客囊空貯閒愁滿不謂相逢重輾轉  
交情豈必論深淺黃鵠一飛天地遠

答宋時用韻

朔風吹裂霜林錦敗葉蕭蕭滿山徑鴉啼落日繞空巢

雁度愁雲蕩孤影思君不來心炯炯白鶴傳書致三請  
想見雲間騎鹿歸坐俯清泉滿清聽喬木千章拔地高  
危樓百尺臨風迴壯顏如玉紅光肥閒意看花綠陰靜  
昨來訪古鳳凰臺二水三山入高詠李陽曾奮漚麻拳  
毛生自脫囊錐穎駉駉虛空不足騁且復滄波理烟艇  
歲月悠悠付笑談水去雲飛兩無競長琴橫膝松風鳴  
深巷閉門苔雨淨秫田秋熟新酒香弟勸兄酌惜光景  
問余別恨如水長幾回空發剡溪興坡上竹翁煩問信



何得風波起，胥井空山歲寒水。雪盛凜凜蒼松千尺勁，  
送宋仲觀迎親江陵

戰塵飛空暗南北，出門每恨山河窄。況復荊州千里遙，  
君家嚴君久為客。天高雁杳音塵絕，十七年間愁百結。  
昨者忽傳消息真，健步如仙髻如雪。上堂白母喜欲顛，  
明朝便買西江船。奉迎歸養無不足，高官可棄金可捐。  
東隣失子西失母，君家具慶寧非天。別君豈必送行曲，  
望君却賦歸來篇。舊聞荆襄樹旂羽，客行不免多愁苦。

嚴君能保千金軀豈無歸夢到鄉土老大還家樂且閒  
溪柳山花總如故君今去去須早歸白髮慈親倚門暮

代送安成潘判官

玄雲夜開景星現野田秋枯甘雨遍潘侯為政今若茲  
在於賤子何由羨安成昔變虎狼都黠者為鼠痴為魚  
西風落日一回首慘淡百尺書臺孤萬馬南來如電掃  
風俗只今還再造遺民一二盡瘡痍潘侯輟哺傷懷抱  
朝馴蛇虺歸青山夕抱赤子衽席間一朝威武收功易

三載撫字推心難潘侯報政赴京國不敢含啼卧車轍  
再拜君王願借恂重來早建黃金節

古劍歌為李伯謙賦

先生重劍如自重藏之深山不輕用寶匣夜開紫電飛  
滄波曉淬龍光動干將湛盧不易求英雄今古良悠悠  
鴻門舞散玉斗碎吳宮鼓絕蛾眉愁銅花玉暈文章露  
野人願致華陰土佩之自可無邪心袁公竒術何足數  
先生揮毫山館中光芒似欲爭詞鋒白照晴空鋪雪練

碧含秋水生芙蓉邀我一見神悽惻坐歎毛錐老無策  
何當借我小試之目前且斷讒夫舌

古桂樹行

六月十五日龍可道邀飲古桂樹下積雨初  
晴綠陰如洗入夜酒酣可道立索詩因賦

六月塵沙倦長道却愛君家桂樹好桂樹未花意自香  
暮雲捲雨秋先到月光滿地無灑掃石磴高低藉幽草  
滿壺美酒共傾倒一洗煩襟靜懷抱昔年夏屋高渠渠

祇今結茅自有餘兄弟白頭俱孝友高堂慈母多懽娛  
兵革未息民未蘓吾徒正合山巖居子弟長大宜讀書  
浮雲富貴何有無桂樹與人共長久從此栽培更深厚  
萬葉團陰烟霧間孤標發秀風霜後半畝玲瓏斜月透  
翠光寒色浮衿袖八月花開我再来君當剽貯千鍾酒  
和酌李憲文送茶

鰲山峭石攢碧空物性苦硬氣所鍾野老鋤雲種茶薺  
年深獲利盛農功雲蒸霧滃春濛濛一槍兩斝戰東風

采掇可以羞王公西山白雲將無同我家住近鰲山下  
糴米買薪日無暇長夏飲水冬飲湯風月交遊足清話  
君年甚少甚瀟灑摘鮮分贈金同價已看雀舌堆滿盤  
況復驪珠動盈把讀書窓深午烟微竹爐石鼎生光輝  
玉川七碗吃不得以少為貴知音稀君子浩蕩不可羈  
好追彩鳳天門飛白玉堂前春晝永承恩拜賜龍團歸

寄周子諒

人世近年不可道相逢但說滄洲好掃雲放鶴招飛仙

冠屨烟霞任顛倒琥珀香傾白玉壺珊瑚影拂紅雲島  
洲前弱水知幾重跂余望之不能到滄洲美人玉無瑕  
曳裾每在王侯家去年把釣桐江上驪珠飛光照白沙  
野水平橋回首夕陽門掩松陰斜關西老子拂歸袖  
薄俗俯仰令人嗟我初去留謬長策遂使諸生笈王式  
不論世事凋朱顏一雙老眼依然白五月抱病山居窄  
展轉空窓想顏色丈夫豈作兒女悲情深不免傷離別  
為李伯謙題蟠桃三熟圖壽白沙葉巡檢

瑤池春早羣仙集東方小兒吹玉笛酒酣攜得蟠桃歸  
種向仙人未識學仙之人寫作圖風枝露葉青扶疎  
三寶垂世所無持贈將軍惟有餘長歌願祝將軍壽  
千歲蟠桃千歲酒將軍自是山中人好與蟠桃共長久  
丹鶴銜書昨日回為報蟠桃花又開南極老人笑相待  
穩駕虹橋歸去來

題滾塵圖

紫騮脫羈矜得意一團旋風捲平地氣猛欠伸赤汗收



尾長亂撒香塵起筋骨不與凡馬同始知貌在丹青中  
門外水與天河通不然翻身當化龍

同李主敬題李南玉瑞竹詩卷

往來曾看瑞竹圖君家盛事傳里閭阿翁抱孫宴賓客  
祝詞盡誇鸞鳳雛今日重看瑞竹記舊家文物君能繼  
羽毛紅色彩雲端銜圖應作皇王瑞瑞竹脩脩分兩岐  
節疎葉密寒參差濕團曉翠煙花結光浥空青露點垂  
大安園中萬竿綠滿林春筍森羣玉能使一竿如此奇

王猷借看情何足好縱長梢拂紫烟樽前風月招飛仙  
培養深根子孫長主翁與竹俱千年

和宋竹坡見寄

長途浼浼塵沙黃車輪四角投何方歸來却笑同舍郎  
致身何用多文章白紵吟魂消夜雨青燈華髮凝秋霜  
鴻鴈南來同是客蘆花漠漠湖光白稻粱生計良獨微  
入門誰肯相娛悅君家洞口垂紫蘿佩菊紉蘭秋興多  
難弟持盃共傾倒諸孫捧硯供吟哦溪上羣鷗飛欲下

老翁自是忘機者脫巾醉眠呼不醒添入畫圖甚瀟灑  
賦詩招我來相過樽中美酒搖紅波便宜相從飲一斗  
梅花梢上春如何

和羅明信見寄

憶昔羅浮遇仙伯河潤九里分餘澤翻雲覆雨幾晨昏  
到今猶作飄蓬客平生論交無淺深抱琴但欲求知音  
脩竹晚風留獨坐落花春晝愁孤吟遙望君家片雲隔  
短竹化龍不堪策醉語狂談禮法疎知君於我終無責

天寒雨冷我欲歸君詩滿紙龍蛇飛去燕來鴻增感慨  
兔絲松樹長相依

和丁與善

凍鵲不得棲上林鍛羽卑飛空苦心是處掃愁一斗酒  
長年知己孤桐琴緣誰推抱遂至今萍水相逢共為客  
燈火長淹風雨夕悵望鄉關歸計遲聿陪杖屨歡情淡  
嗟我囊空無一錢頭顱贏得千絲雪野性專於魚鳥親  
始知嵇康交欲絕偶題詩句落人間骭髀伊優兩無過

舊遊舊釣挹依然不恨歸雲無託處杯行到君君莫止  
酒醒明朝各分袂霜飛茆屋硯敲冰月上空山劍如水  
寫詩持報腸九迴明年當復為君來相思但見梅花月  
如對玉人銜酒盃

彭中和有贈松林墨蘭一幅許以貺余余因故  
以墨梅先之既而中和賜報以詩遂次韻復之

往年看花落春後金莖琪樹山中少江上老梅迴瘦枝  
寫入山窓自妍好君家雪壁宜挂之繁花不逐東風老

共憐縞袂染緇塵何惜浮雲翳晴昊聞君舊貯書畫多  
松林墨蘭香未磨奪取錦袍吾豈敢纏綿正好如松蘿  
常笑虎頭每痴絕不見人間鴻爪雪何當來往翫心情  
梅有高標蘭有德

題李尚文少府所藏枯柳寒鴉圖

江邊獨柳飛羣鴉敗枝殘葉秋風斜石泉可飲不可啄  
似聞落日鳴啞啞一段淒涼幽思足忽憶看花過韋曲  
上林春早聽啼鶯太液波晴寫黃鵠

題周惟中所藏落雁圖

燕鴻南飛幾千里  
紈素寫之不盈咫  
老翮風高剪斷雲  
寒影日沉迷亂葦  
野烟著樹淡微茫  
山雨欲來秋滿堂  
不是主翁催飲酒  
祇疑短棹浮瀟湘

題邊桂節所藏雪夜訪戴圖

雪光兩岸流素月  
扁舟江上神仙客  
畫史相傳回棹高  
政恐風流變蕭索  
何如入門各盡歡  
主翁有琴為君彈  
梅邊醉漱瓊瑤寒  
絕勝忽忽借竹看

題劉氏雪翁吟卷

仙翁未老頭總白飄蕭兩鬢吹晴雪幾回覽鏡心自疑  
却怪春風消不得面如紅玉眼如月徃徃問年驚坐客  
到今上馬不用扶風流文米居前列新築雪菴倚山北  
竹門晝開紗帽窄花撲春缸酒氣香月臨秋幌簫聲咽  
溪山畫圖甚奇絕萬事只從閒處閱歲寒高誼誰與同  
獨見梅花好顏色玄陰崢嶸厚地裂朔風如刀剪瑞葉  
雪翁長嘯雪菴中俯仰乾坤迴澄澈襟懷寒浥冰壺清



標格烟如璫樹潔近見麻姑兩鬢霜染髭始信皆無策  
何年竟棹剡溪船分我冰花沃焦熱

靜思集卷四

欽定四庫全書

靜思集卷五

元 郭鈺 撰

七言古

和酬黃用泰

聞君讀書近秋浦老大用心更清苦  
錦箋揮翰散晴雲燈火隔窓聽夜雨  
前月西風送好音孤鴻蕩影愁人心  
盈盈一水不相見千里命駕何由尋  
憶昔風塵走長道曾宿君家碧雲島  
一時談笑君未忘十載淒涼我重到

思君長日臨溪頭  
蘆花吹雪迷歸舟  
官錢當十足沽酒  
時官錢一當十  
何當一醉黃花秋

題楊節婦劉氏書卷

桐江江上望江水  
君家有母心相似  
母昔少年失所天  
澄波千丈無泥滓  
瑤琴錦瑟六年中  
孤鸞曉飛繞雲空  
丹心惟抱秋月白  
翠鬟不識春花紅  
老天夢夢恨無子  
仙桂移根中道死  
移來苦栢翠可餐  
忽看滄海飛塵起  
乃知為善報不虛  
諸孫文采珊瑚株  
讀書既睹家聲振

奉珍能盡閑居娛大府具狀上朝省烈士間之毛骨冷  
綸音早晚表門閭貞節芳名重鄉井高年七十顏色和  
蟠桃千歲著花多史臣擬書列女傳撫卷先為題長歌

寄胡伯清

諸公盡說為官好君獨胡為挂冠早朝上中臺脫繡衣  
暮入南山卧烟草聖朝耳目寄所司青天尺五安雲梯  
布衣承詔起江右飛雨隨車到浙西文采已為當途重  
何乃抱才不終用徒步愁聞驄馬嘶舊名還與沙鷗共

自從子陵歸江湖清風高節何代無相逢莫問諫大夫  
黃冠草服我自娛英雄出處不論命笑指南山空捷徑  
鶴舞猿啼山月高酒熟魚肥溪雨溟君今所得良已多  
功名富貴將奈何憑誰寄書與周愷歸來好共釣烟波

和歐伯庸

飛光忽忽催人老白髮不期來獨早氣鍾寒栢兀孤高  
目眩春花自顛倒平生籌策無一奇著身山巖乃所宜  
往事盡付東流水惟有知心勞夢思酒酣拔劍為君起

愛君近來詩句美思君不見獨長哦一唱三歎情未已  
結交何必黃金多長松千尺懸絲蘿王門伶人不肯作  
其若高山流水何昨日花開今日落東風雖好亦云惡  
百年會面能幾時乘興須來不須約

簡周文瞻

先生挂冠竟長往青山白雲注遐想姓名久在縉紳間  
風節欲傾寮竅上天柱峯高鬱蕭爽門前流水供春釀  
小車駕鹿度松陰盤石彈琴答泉響平生老筆稱絕奇

大小二篆皆吾師江虛白沙鐵錐立雲捲空青玉筋垂  
襟懷浩蕩無所惜每逢好事能書之近來題筆滿江右  
丞相中郎千載期往年下筆誰最妙聞之獨數吳興趙  
綉衣御史又得名出處與君不同調高齋日長客來少  
洗硯自瞰萍花沼晴雲飛動碧窓間酒酣得意掀髯笑  
愧我還山茅結廬老去家貧且讀書願求大字懸書屋  
一洗塵穢開清虛竹林雨過暑氣無霜毫染墨多勤渠  
野人拜賜不敢隱虹光應貫斗牛墟

同李立本贈醫

大夫為醫真有人間百病煎百草百草於人尚有功  
聖謨砭訂誰當告聞君獨得聲名早上池分水洗襟抱  
滿煎凋瘵生意回君來絕勝陽春到嗟余病癖老更多  
療之無方愁絕倒錦袍霄漢夢荒涼白髮邱園日枯槁  
平生頗嗜短長吟弄筆至今無一好久欲尋醫今遇君  
安得從君共論討參苓芝朮俱等閒頂門之鍼乃為寶

征婦別



征婦臨行曉妝薄上堂辭姑雙淚落含情欲訴哭聲長  
一段淒涼動林壑從夫不辭行路羞婦去誰為養姑謀  
婦人在軍古所忌今者召募如追囚十年婦姑共甘苦  
一室倒懸空四顧小郎早沒更無人却把晨昏託隣婦  
情知送兒是埋兒姑年老大莫苦悲萬一軍中廢機杼  
減米換衣當寄歸小旂叫呼催早別出門便成千里隔  
今夜不聞喚婦聲愁心共挂天邊月

題金守正所藏謝君績秋山讀書圖

晴雲日高澹林木澗水縈迴繞茅屋白髮何人似我閒  
長日空齋把書讀謝公湖海今倦遊乃知筆力老更適  
西山一點千仞秋臨風回首情悠悠

題袁寅亮進士所藏袁安卧雪圖

大雪僵眠呼不起錦袍公子何由至苦寒未可更干人  
斯言便爾含春意他日登庸勲業崇素心已見卑微中  
党家歌舞擁爐紅歡娛一晌寒烟空畫史經營自風致  
琪樹瓊花照天地舊家青氍君勿忘公侯子孫當復始

題蕭質所藏終南雪霽圖

玉龍銜燭晴光吐怪底空簷響殘雨南山一夜服還丹  
滄浪之水總如故公子昨朝愁出戶錦袍圍春醉歌舞  
赤脚老樵拾斷薪畫史何由得深趣早梅回暖動精神  
凍雀翻叢動毛羽筆端生意開紈素恍然不記寒宵苦  
泥滑迢迢江上路行客茅簷不少住世間捷徑渺何許  
已有扁舟候江許隔浦長橋似灞陵何如著我騎驢去  
黑貂擁醉詩思多明日歸來為君賦

送李原貞遊淮

君歸省親親已老如何又涉長淮道長淮千里快壯遊  
不似斑衣兒戲好棹歌聲齊催發船烟花看柳媚晴川  
酒瀉紅光照白日詩傳佳句驚離筵丈夫意氣吞餘子  
百年養親當養志空山憔悴亦奚為捧檄曾聞為親喜  
再拜勸君金叵羅問君年紀甚不多漢王好少今若此  
攀龍早早騰銀河白璧黃金無足惜庭闈懽聲勝歸日  
鶯花春暖吳宮深鴻鵠風高楚天碧

春暮吟

玉壺沽酒青絲絡啼鳥勸人滿杯酌落紅滿地晴香消  
濕翠如烟午雲薄畫樓玲瓏隔彩霞樓前雙鵲鳴喳喳  
想見吳帆北風起王孫明日當還家

割股歌為戴氏子賦

昔人狗恩自割股儒生靳靳不相許君今割股母疾瘳  
一寸丹心吾所取母年老大呻吟苦恨滿西山日將暮  
劉苓粉參竟無補此事曾聞耆舊語揮刀剜肉號蒼天

百靈昭昭瞰庭戶血流及屨不自知何暇更要鄉里譽  
明朝問膳俱復初不用諸孫扶健步匹夫精誠動天地  
六月飛霜有其故雪消脩竹筍穿林日射錦桃花滿樹  
春風轉暖春晝長滿壺美酒斑衣舞

同宗弟文炳宴集余以病不能往中和仲簡偕  
行且有登覽之樂因事觸興形於詠歌俯仰  
之間余不能無憾焉聊復次韻

出門朝夕望西嶺白雲千頃儀形靜縈空飛徑愁躋攀

元猿抱子行相引眼空不覺梯身高羲和迴車近人頂  
老樹憑風爭怒號危峯拔地相撐挺絕谷遙聞瀑水聲  
微雲忽墮孤鳶影吾宗結屋紫翠間彷彿人烟似仙境  
主翁呼酒醉東籬一曲未終俱酩酊白髮簪花人更嗤  
豈為諸生玩光景蘭茝已隨蕭艾化人情不似江流永  
曲彈別調終無聞藝入剝員空有逞軟盟惟待桑苧翁  
長向空山煮春茗翻雲覆雨胡不然撫事從今夢初醒  
江山千里老驥鳴風露五更孤月炯閉門落葉紅滿階

賦筆登高再難騁只將緘默謝友朋混沌何由效溟滓  
荆軻詞

燕山雪飛青宮閉攬揄夜暖沉沉醉北斗黃金何足多  
一筋深恩美人臂寒風蕭蕭度易水匕首光芒泣神鬼  
畢竟明年祖龍死恨不報君為君喜

張良詠

韓成未死思報秦漢燒棧道吾兵神韓成已死思報楚  
始知漢王乃天與昨日相從赤松子今日已見淮陰死



控御天下漢業崇不受控御真英雄

石崇詠

樓上唱歌舞綠珠樓前馳檄收齊奴紅裙飛墮喚不甦  
一死不救赤族誅倚闌恨不忍斯須緹縈沒身尚可圖  
報恩但願主翁壽傾城顏色何代無

王猛詠

五馬渡江老臣泣垂死丹心在王室當年非不思南來  
王謝豈能生羽翼魏相張儀尚為秦聊借羌苻展才力

江南雖僻不可圖青史千年誰獨識

乙卯新元余年六十目病又甚撫今懷昔感慨  
係之適諸弟姪來賀因賦長句

憶昔軍麾滿南國性命一絲懸一息老天與年補長貧  
白髮蕭蕭今六十崑前桂樹倚半空臺上牡丹高數尺  
雨露皇天根后土前輩風流我何及燈火讀書眼盡昏  
杖屨遊山足無力齒牙動搖亦已落逆旅應催早行客  
高陽酒徒誰獨存蘇門先生人未識春雨魂消韋曲花

秋風怨入山陽笛檢東方知禮法疎筴談尚倚心情密  
甕頭新酒甜如蜜羣從彬彬賀元日一庭晴色毳袍輕  
醉筆重拈百憂失

高節宅中秋宴集

十年不到桐江上畫棟飛甍歛高爽長風送月作中秋  
主翁攜客傾家釀筠谷山人飲不多半醉半醒發清唱  
嫦娥怪我髮星星筴談猶作青年想千里嬋娟千里情  
不期此夜從君賞丹桂香清白露飛黃蘆葉碎微風響

好懷得酒須放蕩何必拘拘絆塵鞅圓缺陰晴轉眼間  
古人今人幾惆悵但得明年有此情抱琴江上重相訪  
十七日飲蕭觀遠宅候竹坡不至

候君直過橫塘曲白藕作花浸寒玉秋香捲入桂樹枝  
主翁新酒今朝熟待君共泛盃中綠前輩風流照心目  
白髮雲間不可招離情寫向窓西竹

和周公明兼柬李子晦

聞君何從得拱璧神功雕琢無難色如此奇材自不多

况復芳年何可及事業雲霄應有時學問淵源豈無極  
論交每恨識君遲下筆還能愈吾疾自從患眼親舊疎  
空階落葉無行迹相知誰似李先生精神玉立仙中客  
軒昂自是離鷄羣骭髀何慚倚門側每從東阡望南陌  
十日不見苦愁絕隴頭春色入梅梢俯仰流光長歎息  
王粲登樓不自聊季子多金又何益相逢各賦去來篇  
官家已見頒新厯

贈曾葬師

洙泗水西馬鬣封龍虎山下留侯宮當時相地果誰在  
能使累世疏恩隆聖人立參天地功老莊之說將毋同  
後來作者纔萬一輸金償璧言非空廬陵老仙曾艮峯  
拂衣光吐蒼精龍奇觀欲凌蒿華上寓迹多在衡湘中  
卓卓景純書滿腹昂昂盧植虛如鐘夜語飛觴驚座客  
曉行控鶴追仙跡恩流黃泉舞白骨義激婁子撼王公  
我今白髮飄亂蓬惜我與君不早逢邂逅今日無匆匆  
神仙骨相須英雄薰天富貴非我家再拜何策驅詩窮

寄友

江波茫茫雪千頃斜陽閃閃歸帆影行人過盡不逢君  
綠酒滿盃誰共飲飛光如水不可留思君如仙不可求  
風捲落紅千萬片滿空散作相思愁

丙辰上巳與新喻龔履芳同郡周公明羅澄源  
諸孫仲雍登南山絕頂歸息於雲壇意驩如  
也公明賦長句次韻

老懷恥為繞指柔常恨不得登三邱春花滿眼春日美

江山何往非勝遊啼鶯一聲碎幽寂南山面目如初覲  
碧桃紅杏相送迎翠栢蒼松分主客目送飛雲不可攀  
巨石人立當前闕飛徑縈迴不知遠相逢樵牧俱懽顏  
桐江如帶纔咫尺彷彿青原雲外碧鴻鵠凌飛天地寬  
蛟龍捲水滄溟窄第一峯尖知幾盤足力雖乏飛吟魂  
蘭亭陳迹不復見有酒自可開窪樽龔公氣宇剡齒萃  
周郎風韻甚超越俯仰乾坤散百憂人烟縹緲神仙窟  
題名絕壁慚魯臯輸君年少筆力高好詩不作山靈贈



往返策我成徒勞紛紛餘子風斯下只合從今結鷗社  
歸來高詠舞雩風一幅畫圖無買價惜哉蕭郎阻天涯  
回首悵望重咨嗟人生離合各有數苦吟能使雙鬢華  
我今萬事慵不理空抱長琴寄流水他年上巳欲登高  
故事相傳自今始

春夜吟

月色如冰花如雲美人樓上歌迴文棲霞飛起玉階樹  
香風吹動殷紅裙去年寄書到君側書中只寫思君切

情知人老髮如絲君歸不恨緣君白插花記月夜未央  
他人苦短我苦長若使驅車到家日天涯芳草愁茫茫  
狂客行

美人當憲捲珠箔狂客花陰彈黃雀黃雀低徊嬌不飛  
金丸偏著搔頭落與君未展平生親奈何調笑如無人  
萬一樓頭是夫壻百年恨怨將誰陳君心誤認雙蝴蝶  
搖蕩迷魂招不得

題山水圖

我行不到山中久忽見青山為回首似聞流水響鳴琴  
恍若寒雲落襟袖松下茅菴絕瀟灑甚欲從之度長夏  
振衣大笊問主人主人道是孫郎畫

明妃曲與宜春龍旂餘杭吳植真定魏巖分題  
並賦

女無妍醜入宮見妬縱使色傾城不如嫁鄉土承恩初  
駕七香車豈知今日馬上彈琵琶羶車飛白雪茸帽吹  
黃沙不恨君王棄我天之涯却恨父母嫁我天王家自

入宮門一回首薔薇香消縷金袖淚痕長伴守宮紅誤  
人何待毛延壽將心寄語後代人貧賤闕天不係身隴  
頭萬一無青草埋沒風沙空苦辛

雙蓮曲

鑑湖上雙蓮開綵雲不收並香腮二喬卧讀兵書倦鏡  
光如水臨妝臺兩心本同意羅襪凌波回冰絲透骨成  
連理紅鮮翠濕鴛鴦猜錦筵美人荷葉杯勸酒滿飲舞  
袖迴綠房青子無相催牡丹凋瘁秋菊推奇祥瑞君

須培明日之日好音來共飛霞佩歸蓬萊五雲宮闕高  
崔巍

射虎行贈射虎人

昨日射虎南山巔悲風蕭蕭眼力穿今日射虎北山下  
虎血濺衣山路夜朝朝射虎無空歸家人望斷孤雲飛  
度嶺踰山弓力健虎肉共分不辭遠府司帖下問虎皮  
高枕髑髏醉不知虎昔咆哮百獸走一死寧知在君手  
鼻端出火耳生風拔劍起舞氣如虹昨夜空村見漁火

牛羊不牧犬長卧作詩贈君毛髮寒煩君為我謝上官  
君不見昔日劉昆稱長者虎北渡河不須射

延桂堂辭為李茂才賦

桂樹團團兮堂之下仰承元氣兮根后土偃蹇蕭參兮  
枝交互離立不羣兮儼賓主堂中人兮啟瑤戶攀援桂  
枝兮獨延竚被蓀蘭兮庭堦秋風起兮滿懷日暮兮遠  
望江之水兮涔涔菊芳馨兮秋滿林思美人兮懸素心  
鬱兮深露草靡靡石嶽崙掃白雲兮彈瑤琴抱明月兮

知音酌桂酒兮堂之中子慕余兮聊春容嫋嫋兮秋風  
羌獨立兮靡從虎豹遁兮晝寂白露湛兮寒滴龍從兮  
淒淒蕭蕭兮颯颯發長嘯兮攬清秋攜美人兮醉我醺  
慨世俗兮悠悠攀援桂枝兮長淹留

贈王儀

曉日照射碧海之珊瑚我思君兮文采殊明月飛光萬  
頃之秋水我思君兮情調美朝騁望兮朱戶夕夷猶兮  
綵舟迴棹雙溪花雨暝捲簾萬壑松風秋昨日偶相遇

池館邀我住我有閒愁千萬縷挂在落日寒烟之古樹  
抽刀割之斷擲向東流去丈夫磊落天地間傾人意氣  
移南山干戈滿眼吾道喪今日見君多厚顏君莫哂壚  
頭酒壓黃花脂典衣且復從君飲悲歌擊劍晴光吐虹  
跨海斬鯨誰知雌雄半天飛雨萬里長風夜窺玉匣雙  
龍騰空

金雀屏送人往章貢成姻

金雀屏翠羽紅翎照簾幕馬上郎君雙箭飛佳期不負




藍橋約藍橋咫尺間青鸞去復還桃花曉泛春江暖玄  
霜夜搗仙宮閑仙宮閒情窈窕重開金雀屏拍手迎郎  
笑流蘊帳暖酒微醒銀燭花高漏聲曉

賦得籬上雀送宜春龍旂伯章赴長沙

瞻彼上林萬木交錯爾獨何為傍籬落不如南溟鵬又  
不似遼東鶴高飛無力天地遠短棘疎烟晚蕭索遺穗  
蕩盡山田空虞羅不收溪雨作未看春日百花晴寧惜  
窮陰一枝惡嗚呼壯士當雄飛八翼天風散寥廓紫鸞

丹鳳參翺翔愧爾啁啾籬上雀



靜思集卷五

欽定四庫全書

集部  
靜思集卷六  
七

詳校官檢討臣德生

中書臣劉源溥覆勘

總校官降調編修臣倉聖脉

校對官中書臣潘奕萬

謄錄監生臣聞益

欽定四庫全書

靜思集卷六

元 郭鈺 撰

五言律

春思

迴舟桃葉渡空數落花鈿門閉紫苔雨鳥啼青樹煙相  
逢疑夢寐此別隔山川想對銀臺燭猶題錦字牋

中秋與索方飲田家

今夕是何夕桂花香滿樓金貂換美酒玉筍照清秋好

月偏憐客殊鄉足散愁主翁從笑罵長判不封侯

秋望

長嘯動岩壑秋風生滿林片雲隨雁度疎雨約蟬吟  
燕馬關山遠吳船歲月深歸來蘓季子何用苦多金

從軍

減袖作戎衣為儒事却非心肝同感激名位却卑微  
浼黃塵合悠悠白旆飛將軍先陷陣奪得紫駟歸

苦雨

雨寒滯茅屋昏曉候春晴歌枕江聲近捲簾雲氣生花  
開從過眼夢倒最闕情況復轉輸苦邊隅未息兵

雪洞為吳巴圖喇都事賦

船拓粉窓虛丹青不用塗晴波涵貝闕寒月浸冰壺旗  
舞魚驚電燈明龍玩珠紅塵飛不到深坐按兵符

入城

不見平安報酸風雜鼓輦雨寒催日短雲黑壓城低枕  
席啼痕滿鄉關去路迷將軍多異見誰與慰烝黎

復愁

猛士憑城險四郊  
今若何纔聞一馬獻  
已費百金多江  
雨舟無渡山雲鳥  
獨過君王不相負  
諸將且須和

歲除前三日

一歲餘三日還鄉鳥  
道通論兵無衆寡  
決勝在英雄短  
髮思親白衰容  
待酒紅出門親舊滿  
共訴客囊空

王志元邀度歲不及赴敬答以詩

東門問來使  
晚歲許相迎  
野樹懸雲氣  
江波挾雨聲  
虎



饑寒更出驢瘦滑難行好是城南酒燈前只自傾

除夕

短日如年度寧知歲又殘鄉關一水隔風雪五更寒寄  
食囊垂罄更衣帶盡寬主人供帳好猶作太平看

江路

江路雪稜層囊空仗友朋炊煙晨減米乞火夜分燈白  
鳥踰青嶂蒼松舞翠藤鄉關長在望歸夢久無憑

憶弟

時危思共濟謀拙阻相聞念母誰無子持家爾不羣江  
煙寒織雨山鳥暝穿雲悵望歸無計悲啼向夜分

元夕

聖主初臨御舟車萬里通上元開夜禁樂事與民同燈  
引飛星動簾栖香霧濛誰知今夜月照我坐書空

和王志元雨晴

客枕愁春雨漁歌答晚晴殘雲棲樹濕新水與橋平穉  
子買魚至主人窺筍生酒來即傾倒何問阻歸程

愁邊

白髮逼人甚愁邊寇未平江山含殺氣草樹作秋聲誰  
復思何武人多厭禰衡功名汗馬得儒素足相輕

舟次峽江

江上晚晴好臨行復艤舟雨龍歸大秀水鳥度巴邱公  
瑾人中傑子貞方外遊時危論出處吾道莽悠悠

題周瑜廟

雄姿不可見遺廟俯江干簫鼓龍祠近旌麾虎落殘樹

勲先葛亮定伯走曹瞞獨恨三分後無人憶漢官

早春江行寄周子諒

茅舍一尊酒獨行江上歸風高去鳥疾野迴炊煙微青  
青麥苗長娟娟蕨芽肥寄語山中客無為空苦饑

雨夜宿豎圻

倚江茅屋小白髮困淹留燈影搖鄉夢雨聲添客愁二  
儀無定位萬國總深仇誰省驪山事終同草一邱

和郭順則見寄

振衣楚山曉扇外暗飛塵蘇武終還漢揚雄獨美新  
栖鳥頭欲白來雁信非真懷抱向誰訴江鷗或可親

江上

江雲捲飛雨涼意靜書帷兩岸鳥歸盡孤舟客渡遲  
物情皆自適人事每無悲不惜買山早黃金何可期

寄歐陽奎文周

長笑對南山浮名不似閒布衣經歲月茅屋寄鄉關  
山曉捲簾坐雨涼看竹還今辰是好日把酒桂花間

壬寅正月十三日客退後書

酒從前日盡客又幾人來掃石俯流水煮茶看落梅為  
儒生事拙會友好懷開但得情無媿妻孥不用猜

用前韵酬曹彥明

江上一盃酒春風今再來將心托芳樹回首見青梅沈  
醉有時醒閒愁何日開海翁機未息鷗鳥故相猜

同李主敬贈李將軍修隴西公墓

李侯將家子重拜隴西墳宰樹回元氣豐碑補舊文子

孫長振耀翁仲亦歡忻側想神靈語嗟君用意勤

春雨

日夜雨懸懸問春春可憐好花俱薄命似我負芳年雲  
氣低簾外江聲到枕前何時是寒食早已禁厨烟

桂林對雪

高閣延飛雪浮浮天際來亂飄隨地濶急舞逐風迴寒  
壓晨煙濕光搖暖氣開四山勢欲合雙桂立崔嵬

登樓

茅屋厭卑濕登樓思不羣  
天邊春色早窓外暮寒分  
把酒邀歸鳥捲簾驚宿雲  
直須借一榻高臥避塵紛

哭吳林鎮撫

幕府十年別煙塵暗楚關  
全家歸浙右匹馬老兵間  
劍術終難試銘旌復不還  
故人誰在側魂斷萬重山

經周進士聞孫墓二首

次首重到  
一本另起

白日下幽谷孤墳宿草荒  
文章唐進士兒女漢中郎  
知已長難遇憐才久不忘  
浦雲歸樹暝相顧色淒涼



青山山下屋重到最傷神門掩桐陰日池分草色春雨  
雲翻覆手石火去來身誤殺空梁燕歸尋舊主人

雨中有懷

山中十日雨滿眼綠陰成園減蜜蜂課樹藏鶯鳥聲舊  
遊多掃迹久別每關情肝胆竟誰是淒涼白髮生

遊山觀佛堂和李尚文少府題

細雨涼生樹歸雲暝入樓燈懸金粟並香蓊翠煙流秀  
老詩多好川明醉宵留濯纓吾欲往春浦水如油

十一月二十四日彥充弟忌日因歎成詩

瘞骨荒山道淒涼十六年老兄今白髮慈母久黃泉世  
事不如意修途無息肩夢回孤客枕猶自淚涓涓

秋晚

獨坐不知晚捲簾雲正歸門因無客閑事久與心違壚  
曲蒼煙合林梢黃葉飛老懷付蕭散行到釣魚磯

九月朔日發家書

黃菊盡開未主翁明日回紅飛霜遡葉翠長雨階苔病

眼隔重霧狂心著冷灰但須壓新酒兼有故人来

寄李子晦

懷刺將安往閉門空自勤山岩宜置我風月每思君揮  
翰唾成玉飛觴氣吐雲春來林木變鶴唳不曾聞

山館二首

偏側不敢怨飛騰殊未能野猿時送果山鬼夜吹燈口  
腹久為累語言難盡憑白頭方檢束飽肉愧飢鷹

貼石支松榻閉門收蠹編故人久不至病客得高眠松

搖晚風怒簾分夜雨懸老禪應可學世故苦相牽

己巳元日次從姪瀾韻

太平應有象王國早生申雲捧虞淵日天開壽域春千  
年周鼎重百戰漢兵神側想朝元殿征南獻凱頻

和蕭伯章見寄

王孫文采盛千里入神交貧極錦囊在愁來金盞拋雨  
迎龍出峽雲護鶴歸巢欲寄相思意梅花霜後梢

黃州有警聞從弟銑已過興國度早晚可到家

次首憶  
從弟鐸

戎馬壓黃州君先理去舟艱難千里遠貧賤一身浮宿  
將今誰在親王只自謀長江如失險鄉國足深憂  
憶昨王師捷還鄉近五年艱危惟我共俯仰得誰憐茅  
屋秋風裏烽煙夕照邊亂離今轉甚思爾只高眠

野宿

誰謂歸田好荒煙暗棘叢邊愁攢戰馬野宿逐征鴻  
屢山涵雨煎茶竹送風讀書成落葉擬學六鈞弓

靜思集卷六

欽定四庫全書

靜思集卷七

元 郭鈺 撰

七言律

寄吳杜徵君

武夷空翠接秋陰  
古木蕭森石逕深  
中使又傳丹詔至  
山人長對白雲吟  
松花未掃風過席  
芝草初耘雨滿林  
九曲畫圖歸內府  
君王應許遂初心

送龍光庭赴都

帝城此去人千里馬上題詩記舊遊  
官酒滿傳鸚鵡盞宮花飛點鸛鷗裘  
星迴東壁文光動日麗中天王氣浮  
禮樂百年多述作才賢深足應旁求

登宜春衛公岩

衛公舊日讀書處葺落孤亭紫翠中  
野迴虹光分暮雨天晴木葉響秋風  
武皇國勢資雄畧牛黨私仇累至公  
論定是非誰復在晨鐘空託梵王宮

送胡元禮歸合肥省親



秋風林薄暮蕭騷千里庭闈屬望勞天入秦關開去棹  
霜飛楚峽擁征袍每看潘岳閒居好始信張翰歸去高  
我亦天涯漂泊久因君愁思滿江皋

和虞學士春興八首

官河春水湧輕濤來往千艘不用篙江浦女遊遺玉佩  
瑤池仙降獻金桃秋千拔地煙花暝閭闔中天日月高  
早歲功名看得意扶搖風力送鴻毛

鳴珮天階委碧莎雪消太液漲晴波玉盤露浥仙人掌

宮錦花添織女梭王子問安回輦近儒臣進請賜金多  
明朝引見狔狼使樂府新傳天馬歌

沙苑煙晴首菊肥朝回天馬錦為鞵詞臣會送歸青瑣  
進士傳呼換白衣雲氣曉依宮樹近春陰晝護苑花飛  
君王又進長生藥萬里樓船海上歸

城上觚稜霧靄迷角聲吹徹鼓聲齊雲生水殿龍常現  
月滿官松鶴並栖風俗元存中國舊天文並拱北辰低  
倚樓欲問通霄路誰借青雲百尺梯

萬里驅車入帝關十年棲息一枝安承恩數對麒麟殿  
却老何資龍虎丹金水漲波融雪盡碧桃分並到春闌  
江南却憶看紅藥紈扇羅衣不識寒

清明烟散柳枝斜宮樹沈沈點白鷗暖霧撲簾成細雨  
朔風吹面射飛沙江南最憶王孫草天上催宣宰相麻  
十載滄洲孤舊約鹿車何日共還家

柳林笳鼓曉晴饒王子春蒐出近郊雲錦宮袍掛萬馬  
鐵絲箭鏃落雙鵬蒲桃壓酒開銀甕野鹿充庖藉白茅

共說從官文采盛不聞舊尹賦祈招

浩蕩天風駕海航恐從兒女問耕桑珠聯魚目知誰識  
劍吐龍光不自藏司馬倦遊曾建節買臣歸去密懷章  
只今豈是無詞賦材俊中朝少薦揚

送王國琛使君赴福州

閩嶠來迎新太守旌麾遙颺海雲低天書夜下羣龍會  
露冕春行五馬齊荔子已無中使勅繡紋猶作白衣題  
佇看到日傳嘉政棠樹春陰滿建溪

賦得越王臺送萬載教司令之官

層臺高與越山齊  
南斗諸星入地低  
海氣秋澄鴻雁到  
野煙春合鷓鴣啼  
官船北走輸珠翠  
幕府南開振鼓鼙  
側想到官多暇日  
登臨長聽玉驄嘶

送萍鄉袁茂才歸縣試吏

玉關門外班司馬  
抗疏歸來白髮愁  
絕域功名空老大  
少年鄉國自風流  
花飛細雨朝迴馬  
月滿前川夜放舟  
始信封侯馳萬里  
不如吏隱近滄洲

寄孫仲植文學

秋來最憶孫文學  
無數黃鸝啄黍肥  
得酒定邀諸弟飲  
看莢應少一人歸  
蒼龍出峽雨先至  
白馬渡江雲共飛  
季子敝裘今更少  
還鄉信使故應稀

寄阮弘濟兼簡楊亨衢少府

舊時文物數江東  
誰似風流阮嗣宗  
紅袖醉歌金縷曲  
牙旂歸導玉花驄  
神仙原與塵埃隔  
賓客多應氣概同  
寄語龍泉楊少府  
園花不減舊時紅

東王奎伯仲

我愛王家之二難越羅裁剪春衫寬折花滿簪紫茸帽  
寫詩自作烏絲闌玉壺載酒留客醉竹竿把釣攜兒看  
明朝更約溪南去一樹錦桃花未殘

寄劉淵茂才

字象賢

山館前宵忽夢君紵衣如雪照晴雲門前種菊開三徑  
壁上題詩寫八分酒浪紅深傾琥珀斲臺翠澁繡龍紋  
多情拍畫秦臺近一曲鸞笙月下聞

和虞學士登宜春臺

萬家平地擁高臺，窓戶層層近日開。  
鶴致瓊花迎帝子，龍持貝葉禮如來。  
雲依老樹秋如畫，峽束飛濤雪作堆。  
惆悵當年歌舞地，碧桃開落幾千回。

題興岡王祠

萬山濃翠湧飛濤，縹緲王宮結構牢。  
兵衛焜煌連鎖甲，香煙浮動鬱金袍。  
晨飛脉嶺雲初散，夜舞胎山月正高。  
仙苑碧桃春自醉，豈容野客薦溪毛。



澄虛亭

匹馬江上行且停蒼松夾道風泠泠波光倒吞落日白  
雲氣下接炊煙青山僧獨行掃殘葉水鳥雙飛迴遠汀  
主人邀客領奇勝賦詩把酒澄虛亭

賦鶴骨笛

雲沈碧海葬飛仙樂府新裁紫玉員律呂相和依象管  
雌雄猶似唳芝田老蛟夜舞君山月采鳳春遊嶰谷煙  
想是好奇心獨苦琵琶昨日購鷗絃

賦文山硯

碧玉秋涵曉露滋相君十載共襟期承恩久在文章府  
借潤終無軟媚詞旗舞龍蛇廷對早詩成珠玉載歸遲  
可憐月落空坑夜無復追隨到鳳池

早秋有懷歐陽文周

日暮獨迴江上舟江波不盡思悠悠虹垂青澗分殘雨  
風滿碧梧鳴早秋用世有材須汲引思君為客久淹留  
綵樓七夕涼如水知共何人望斗牛

寄楊和吉

不見故人愁我心江山信美倦登臨  
附書白鶴幾時到結屋翠微何處尋  
風撼竹樓憑雨勢雲歸溪樹作秋陰  
琅玕細簟涼如水應掃桂花彈素琴

和李茂才牡丹

舊來聲價洛陽高歌舞千金費酒醪  
霞擁暖紅圍采檻日描晴影繡宮袍  
百年富貴花神醉一曲清平筆力豪  
近說開筵追勝事詩成壓倒舊官曹

哭宜春義士彭維凱

維凱復袁州遣迎監郡某元帥以下歸視事守土將

某忌其功遂殺之

風折旗竿臥落暉殘兵揮泪脫戎衣徒聞即墨田單在  
不見成都鄧艾歸獻凱何時承寵渥爭名自古抱危機  
宜春元帥還相問近報洪州未解圍

宿七里山

十一月二十二日余始得逸歸值臨江兵至楚金追斬九十九級軍聲始

復大震

寒松霧暗月西頽人語無聲鬼語哀郡國忍聞侯景詔

朝廷初棄戴淵才風傳鼙鼓驚魂戰天入鄉關望眼開  
骨肉死生俱未卜泪痕血點滿蒼苔

癸巳元日

屠蘇酒暖破朝寒舊寫桃符忍再看太史未頒周正朔  
遺民思覩漢衣冠天邊星斗孤槎遠雪後江山萬木殘  
再拜中庭賓旭日共瞻霽色散雲端

二月二十七日聞故鄉寇退

銅駝荆棘換東風消息南州久不通芳草得春煙漲綠

野棠無主雨飄紅  
凋戈元帥登壇暇  
寶玦王孫哭路窮  
亂後親朋總悽惻  
相逢但索語音同

寄龍子雨

書到山中收泪看  
出門愁散楚天寬  
落花春盡休文瘦  
細雨更長范叔寒  
金帶宦情違俗久  
綈袍交態見君難  
欲為後會知何日  
酒熟還家得盡歡

贈劉明道

義旗獻凱滿南州  
君擁兵符控上流  
隔岸人烟鄰虎穴

中江雪浪送龍舟  
鉤鳴秋匣元霜下  
馬浴晴波紫霧浮  
白羽指揮能事集  
底須萬里始封侯

秋日還山聞南省消息示從弟銓

南國風高聞好音  
隣翁酒熟晚相尋  
雁飛漢苑書來往  
竹暗湘江淚淺深  
茅屋暫歸秋四壁  
柳營煩費日千金  
瘡痍早使能蘇息  
獨抱長貧亦素心

重和荅周聞孫進士兼寄宗瑾

飄零不改舊鄉音  
來往空山費獨尋  
楚地人烟三戶在

漢家宮闕五雲深  
急風亂颭蕪葭雪  
斜日殘明橘柚金  
公瑾雄姿最英發  
還鄉何日共論心

分府同知瑤童相公大閱之日天使適至喜而

賦詩奉寄劉賓旭參軍

鼓角緣邊永夜哀  
使車忽自海南來  
中朝舊法三章在  
大將新圖八陣開  
玉帳分明傳號令  
金臺雜遝貯賢才  
早看送喜麒麟殿  
五色雲中進壽盃

金絡銀鞍翡翠裘  
參軍馬上最風流  
相逢把酒青油幙



每憶題詩黃鶴樓采鳳銜圖堯殿曉蒼鷹整翮楚山秋  
攀龍早及風雲會歸換貂蟬尚黑頭

韜鈴兵衛立參差軍務初閒且賦詩健筆有神傾後輩  
美名如玉重當時青雲鶴引朝天路白羽鵞翻洗墨池  
近見元戎再乘勝憑君多製凱歌詞

侯印軍符塞紫衢儒生白髮混泥塗兒騎竹馬談兵法  
地畫桃源入戰圖雙劍舞閒歌激烈一燈愁絕照清癯  
山中薇蕨秋風老心折孤村反哺烏

和楊繩彥正茂才

仗劍三年去里閭  
桃源仙客獨安居  
雨鳴脩竹涼歌枕  
花落小窓晴曝書  
誰與捲簾通燕子  
自須入海掣鯨魚  
村園明日君能到  
一徑蒼苔待剪除

甲午元夕

已無釵釧典村醪  
兒女炊羹薦野蒿  
燈火獨搖元夕夢  
干戈渾減少年豪  
雲韜月色歸天闕  
雨壓寒聲欺布袍  
却憶將軍平冠處  
崑崙夜度不辭勞

雨中過龍西雨

雲連茅屋樹聲寒舊補貂裘帶盡寬  
蕭瑟鄉關愁庾信  
清明風雨過蘇端蒼龍波暖開鱗甲  
黃鳥巢深護羽翰  
側想蓬萊雲氣上羣仙縹緲控飛鸞

感懷

白髮溪翁刷草根晚炊兒女帶啼痕  
斜陽燕語興亡事  
陰雨鬼號新舊魂戰伐不聞烽火息  
誅求惟見簡書存  
艱難負米歸無日夜雨青燈夢倚門

晚過山莊

草滿畬田落照斜  
溪行盡日少人家  
自傷直性從干謁  
誰在窮途不怨嗟  
香火氤氲王子廟  
旌旗明滅長官衙  
主人問客知名姓  
始肯開門喚煮茶

和楊彥正茂才

故山疊疊是愁端  
真宰何由剗翠巒  
客館雨聲燈火共  
皇都春色畫圖看  
花飄金谷彩雲散  
木落洞庭歸雁寒  
見說攜家近仙館  
紅塵咫尺不相干

南省戰船至吉安喜見官歷

干戈阻絕歲時遷  
幾向空山卜月圓  
仍覩帝堯頒玉歷  
兼聞楊僕將樓船  
旌旗日月臨西楚  
帶礪山河拱北燕  
賴有忠良扶社稷  
願聞籌策早安邊

寄賓旭劉參軍

經年避地百憂并  
君獨還鄉少俗情  
淨洗木瓢分藥晒  
新裁紈扇寫詩成  
半蓬溪雨羣鷗散  
萬壑松風獨鶴鳴  
只好閉門度長夏  
巾車莫遣野人驚

送阮弘濟赴梁使君幕

諸生白髮守章句磊落長材自不羣  
河內已留賢太守霸陵又起故將軍  
鐵絲箭簇鳴秋月銀錯旗竿豎曉雲  
文采久為當路重更期馬上立奇勲

贈周原道兼柬安子靜將軍

武節遙瞻漢署郎威稜猶帶柏臺霜  
江通吳楚波濤息天入燕秦道路長  
白羽畫揮談虎略黃旗暮捲護龍驤  
宜春進士兼文武好是青雲共激昂

寄羅履貞兼東謝君績

烽火平安月正中  
思君長倚翠樓東  
儒生憂國燈前淚  
壯士封侯馬上功  
半榻松風看草檄  
一庭花雨坐調弓  
謝莊文采江東少  
青竹題詩想最工

送朱鵬舉照磨赴江西省掾

花外銀鞍鞚紫騮  
省郎文采自風流  
英雄舊總三千士  
美譽新傳十一州  
山擁宜春深帶甲  
江通章貢小容舟  
晨趨黃閣叅籌畫  
願審安危拓遠謀

白鷺洲晚泊呈天隱兄山長兼柬曹居貞

白鷺洲前春水寬  
素王宮殿壓驚湍  
風飄墜瓦鴛鴦冷  
雨暗疎篁翡翠寒  
維翰未能穿鐵硯  
叔孫先已改儒冠  
淒涼講席君仍在  
晚歲冰霜獨立難

大洲宴集

殺賊歸來心甚歡  
酒美不辭春夜闌  
俯江樓迴月色白  
緣邊鼓歇烽烟寒  
玉驄誰送美人去  
錦瑟更為將軍彈  
慚愧書生飲獨少  
自剪銀燭題詩看



寄楊和吉龍西雨

江南徐庾知名久文采風流伯仲間  
彩筆題詩傳上國畫船分雨過西山  
管寧舊向遼東老杜甫新從巴道還  
擾攘戰塵徒旅苦故人應怪鬢毛斑

山中

柴門日落鎖秋陰白酒愁來只細斟  
松下紫苔留虎跡雨中蒼檜作龍吟  
漢宮金狄空垂泣秦地桃源不可尋  
咫尺山中愁出入何時江上足登臨

別蕭伯章

蕭郎三十文采殊錦霞暖轟青珊瑚酒來獨對公榮飲  
詩成笑遣王奎書黑風捲雲慘飢虎黃葉打頭騎蹇驢  
明日山中徑歸去梅花夜月情何如

即事

西上官船日報頻倚門收淚問行人潁川太守終難借  
細柳將軍始是真木落高秋懸殺氣律回寒谷見陽春  
不辭斗粟輸官府但覓山岩著老身

寄劉賓旭

舊日相逢玉雪姿三年幕府鬢如絲  
波濤入海屠龍苦風雨還山買犢遲  
客到定能頻喚酒花開應不廢題詩  
只憐雙劍牀頭吼又是隣鷄報曉時

奉和劉士貴

路轉春山晝啟闕玉驄深繫綠楊間  
延平波浪雙龍合遼海風煙獨鶴還  
扇外紅塵從戰鬪尊前白酒且清閑  
諸孫早歲多文采憔悴青燈我厚顏

寒夜思親

老親白髮抱諸孫寄食偏懷地主恩故國山河空洒淚  
殘年風雪更消魂續麻誰與寒分火待米長孤暮倚門  
生子不才名位晚愁來詩句共誰論

奉寄吳琳子茂鎮撫二首

宜春臺前記勝遊主人與客俱風流春穠攜酒騎小鐵  
夜深分燭歸南樓雁鴻幾年斷書信豺虎是處森戈矛  
聞君總戎下章貢明日相候青門丘

英雄之姿不易得慷慨汗馬收奇功簸旗風高捲飛雨  
舞劍日落搖晴虹官酒春酣百盃綠檄書夜草雙燭紅  
矚看獻凱報天子錦衣五馬蓬萊宮

愁甚

白壁黃金不療飢王孫攜此獨安歸四郊烽火山川窄  
十月雨寒雷電飛豪傑憂時常共濟功名報主不相違  
臨危進退如無據青史他年有是非

殘年

久愁兵氣漲秋林不謂殘年寇轉深四野天青烽火近  
五更霜白鼓聲沈金張富貴皆非舊管樂人材不到今  
江上米船看漸少捷書未報更關心

和周霽海吳鎮撫詩三首就呈李伯傳明府

老子懸車歸舊隱諸孫戲采泛晴暉畫圖煙樹松千尺  
門徑秋花菊四圍得句欲題青竹滿攜琴每候白雲歸  
殘年頗覺頭如雪愁滿江空羽檄飛

牛斗秋高劍氣橫幾人馬上取功名扇揮白羽臨風迴

甲鎖黃金射日明  
賈詡自期能料敵  
山濤誰謂不知兵  
官軍蓄銳何時發  
久厭城頭鼓角聲

愁來倚劍立蒼茫  
誰在籌邊策最良  
捕賊五更唐李愬  
揮戈萬衆漢雲長  
烽烟滿接城樓近  
鬼火寒穿石筵荒  
多少材官鵬羽箭  
不知何日殪天狼

丁酉元日

城北城南暗戰塵  
東風吹淚滿衣巾  
秦讐猶待楚三戶  
漢將徒封趙四人  
此會屠蘇濃味薄  
誰家桃板舊題新

賽神江上情如海且祝平安問老親

風雨舟中作

憔悴江頭路已窮小舟隔岸復相通  
歸雲亂擁青山樹飛雨斜穿白浪風  
避地數年成老醜累人一飯尚西東  
憑誰為息鯨蛟怒容我滄浪作釣翁

感事

荆徐千里混干戈日日君王候凱歌  
上相出師三月罷南人待援六年過  
未休練卒誅求盡暫脫歸囚反倒多



獨拜將壇須國士掄才誰似漢蕭何

道逢八十翁

八十老翁行步奔存亡共訴斷愁魂  
千金歌舞隨流水  
六載干戈棄故園  
晚竈燎衣籬竹盡  
春牛換米草蓂存  
情知青史無名姓  
短策猶期報國恩

東王志元茂才

親朋亂後長相失  
伯仲江邊得數過  
久客問隣賒酒易  
知君隨處賦詩多  
烏啼花樹驚殘雨  
鷗散柳塘迴細波

懷抱暫開欲相問不知佳句近如何

晴曉

寂憶山中桂樹林早春無日不登臨  
衣冠並集吾廬盛旗鼓俄分將壘  
沈山色故鄉青未了鬢毛新歲白相侵  
物情自覺傷懷抱野鳥弄晴空好音

和劉淵象賢晚眺

日落孤城疊鼓聲誰家山北復山西  
干戈滿地愁相續道路還鄉望轉迷  
風度生香花遠近雨團濕翠竹高低

劉郎欲問桃源路紅葉流波好自題

奉同楚金和蒲掾

健兒分隊舞朱干玉帳將軍按劍看笳鼓夜鳴邊月迴  
旌旗曉豎野雲寒皇圖不假山河險民俗終同社稷安  
早晚虞廷有苗格薰風披拂五絃端

奉和劉賓旭兼東羅履貞

時危南國久連兵幕府才華得合并蔡寇遂煩唐宰相  
漢儀猶待魯諸生三邊烽燧晨傳箭千騎弓刀晝繞營

主將策勲朝帝闕從官應許任公卿

送楊和吉過龍興

十月北風蛟鱷伏樓船安穩出官河  
交遊湖海知誰在將帥朝廷近若何  
一水纔通南浦近衆星還拱北辰多  
清和元帥煩相問獨釣寒江月滿蓑

奉贈江西省郎中顏希古

江西羽檄日交馳君佐中書策竅奇  
南極星垂天地正北庭兵合鬼神知  
君王舊賜馮唐節父老新傳李愬碑

盡剗賊壕歸禹貢更煩深意問瘡痍

客鬢

夕報將軍奏凱歌馬前又見擁琱戈民情共倚金湯固  
客鬢惟添霜雪多何日梧桐鳴彩鳳舊時荊棘臥銅駝  
無衣無食歲年晚妻子山中如苦何

小除夕

常年臘月還鄉早弟勸兄酬何怨嗟腸斷此時同避地  
眼穿永夜倍思家鄉關去雁渾無信風雨寒燈不作花

最是五更情調苦城南吹角北吹笳

與黃子益將軍

將軍文采舊知名幕府分曹按甲兵雪壁畫龍晴霧合  
羽林飛鳥朔風輕趙雲對敵關張並馬援歸朝隴蜀平  
憑仗早除狐兔亂吳山楚水共秋澄

大洲晚發

城南桴鼓轉相驚却憶漁舟問水程千頃江波鷗出沒  
數家茅屋樹枯榮客行落日凝愁思人隔疎煙聞笑聲

惆悵竹籬沽酒處夜深燈火不勝情

奉東陳君與掾吏

漢室元勲曲逆侯諸孫文采藹南州  
薇垣地切星河冷幕府霜飛草木秋  
采筆樽前賦鸚鵡銀鞍花外鞚驂騑  
獨憐江海干戈滿願屬安邊第一籌

和酬友人

百年誰肯長拘束每到花時愁悶過  
金石人間春夢短玉堂天上月明多  
歸栖舊燕依林木變化飛魚借海波

逆旅馬周豪氣在  
憐才深意待常何

奉同順則贈鄒省掾

中朝大將霍嫖姚  
材傑如君早見招  
入幕文書金印大  
行營笳鼓玉驄驕  
兵謀合變元多與  
殺氣憑陵未盡消  
好待楚江鯨浪靜  
白雲深處共歸樵

戊戌元日

戎馬七年猶帶甲  
客懷元日厭題詩  
愁來刁斗聲相續  
老去屠蘇酒到遲  
野燒暖回雲際碧  
江梅寒護雪殘枝



近聞拜相登耆舊郡國朝正莫後期

送李謙道入省叔父

中郎不見十年過千里趨陪意若何骨肉共論青眼舊  
形容應接白鬚多三闕虎豹傳新捷百粵鶯花入醉歌  
莫嘆他鄉為客久故鄉是處阻干戈

奉和龍西雨自洪見寄

同此韻和寄楊和吉一首見贈

青樓風月故相干慷慨尊前舞地寬錦繡春明花富貴  
琅玕晝靜竹平安杉闕旂鼓元戎勝閩海舟車去客懽

舊日交親應有問一蓑煙雨楚江寒

和寄龍長史

扇外風塵素不干湖光遙送酒船寬  
錦箋傳草春詞好銀燭燒花夜枕安  
四海交遊空老大百年世事半悲歡  
子真谷口深相憶黃犢無苗風雪寒

和劉叅軍

欲剗蛟龍試莫干東南天地洞庭寬  
鄭虔早被才名誤晁錯終期社稷安  
年老青燈徒自苦時危朱紱為誰懽

直詞照雪慚高誼排悶裁詩淚點寒

和寄歐陽文周

厚祿才疎不敢干幽棲暫遣客愁寬  
屋前老樹留雲宿竹外茅亭向水安  
書寄鯉魚今始到杯傳鸚鵡不同歡  
龍泉舞罷獨長嘯宇宙誰知范叔寒

和寄王仲京

暮雲飛盡倚闌干懷抱何時獨好寬  
天下兵戈愁杜甫雲間鷄犬憶劉安  
每傳佳句看君好想對芳尊共客歡

香染越羅春袖薄  
棟花風起不知寒

和寄從弟鐸

畏途阻絕卜支干  
夕見鄉書意始安  
痴腹於人深有累  
驚魂從此暫相寬  
弟兄相顧三人在  
風雨還孤一日懽  
春色故園付流水  
白鷗應怪舊盟寒

和寄從弟銓

腐儒憂國泪闌干  
江海容身何處寬  
驚報每愁諸弟隔  
臨危但祝老親安  
對牀風雨長相憶  
負米晨昏不盡歡

寂苦二郎獨冥漠晚煙原上鵲鷁寒

贈宋經歷

山繞青原百雉城入關盡說長官清才賢官為明時出  
政事多資贊畫成禾黍秋風螟螣息梧桐朝日鳳皇鳴  
畫閒好讀開元紀節操存心慕廣平

哭羅達則

太阿出匣捲晴虹誰肯埋光九地中萬里攜書來上國  
一時揮翰動諸公杜陵避地身將老宋玉招魂事已空

前輩交遊看欲盡為君彈泪洒秋風

西雲亭種菊未開以余歸期逼迫時預賞之即

席賦

層層種菊繞籬斜秋色偏歸處士家擬鑄金錢酬歲月  
得依玉樹伴烟霞清風江上催行李白髮尊前作按花  
貯酒尚須留九月西風平地岸烏紗

題分宜縣胡于信釣翁詩卷

嚴光不作漢廷臣今日聞君亦隱淪草笠暮歸三峽雨

竹竿晴釣五橋春  
長歌鼓枻知音少  
滿卷題詩入畫真  
馬上行人莫相問  
白鷗波暖最相親

哭蕭叅謀葵翁

南州進士盛才名  
幕府叅謀仗老成  
筆舌夜搖星斗動  
襟懷寒漱雪霜清  
平淮碑踣慚裴度  
哀郢魂歸訴屈平  
多謝沔陽劉太守  
為題文誄弔先生

中秋與郭恒飲從弟宅  
忽聞獬犬陸梁恒驚去  
風清月白臨別惘然  
次日移詩從弟和以寄

懷

兔置雉網林中邊鴻飛冥冥誰使然欲歸故山弄明月  
如隔弱水招飛仙蒼生何時各安堵賤子今日嗟倒懸  
千金不留魯連住銅駝荆棘愁風煙

寄從弟銓

舊廬每愛桂花秋風月涼宵足勸酬盜賊未平身漸老  
弟兄相望淚空流經年避地魚鰕尾何日還鄉烏白頭  
側想早春天氣好掌珠初見慰深愁



寄劉玉正茂才

城南燈火連牀久，獨夜荒村費苦思。  
風雨何時尋舊約，江山是處有新詩。  
海棠春暗飄香盡，鸚鵡天寒喚客遲。  
明日還鄉須作伴，買船沽酒共襟期。

東王志元

收泪看花花轉紅，花前心事想君同。  
幽燕車馬從天下，吳楚舟航與海通。  
貴賤不應懸趙孟，去留終擬報曹公。  
石田秋雨喧鷄鶩，早附冥鴻萬里風。

贈劉淵

老樹蟠堤抱石危  
晴雲過雨出溪遲  
有時歸鳥落山果  
無數飛花懸網絲  
得酒不消為客恨  
連牀長欲與君期  
此情最倚相知久  
莫怪新來嬾作詩

和郭順則登五峯仙壇

蒼山遙拱鬱藍天  
鷄犬雲間盡得仙  
雨散天瓢彌八極  
碑磨崑石照千年  
漁舟隔浦搖春浪  
茅屋倚山炊午煙  
見說隣僧知敬客  
長廊晝靜共參禪

用王冕韻送解元祿茂才

時危結屋傍岩阿，野逕春烟匝翠羅。  
四海俊賢唐貢舉，百年父老漢謳歌。  
山涵霧露藏玄豹，水會陂塘散白鵝。  
地僻此時賓客少，松陰掃石坐長哦。

避地石洞有懷羅處士就東周以立進士

勍敵雙崖立洞門，石稜斜鬪浪聲喧。  
屋前松長山人去，堂上藤垂石佛存。  
西望鄉關通鳥道，舊題歲月滿苔痕。  
重來又迫干戈苦，空憶桃花遍水源。

樓居晚對

四山紫翠鬱嵯峨  
愛此樓居每獨過  
窗戶晴通雲氣濕  
竹松暝挾雨聲多  
時危耆舊疎來往  
地僻漁樵共嘯歌  
對酒暫開懷抱好  
莫思戎馬近如何

寄楊和吉歐陽文周

黃鵠一飛幾千里  
高標矯矯離風塵  
宗元有恨為司馬  
郭泰無名與黨人  
富貴致身何用早  
是非論事惑難真  
二君舊日皆知己  
旅食他鄉莫厭貧

送別從姪淳

愁心長繫晚峯青  
避地何時馬足停  
草樹四山區域小  
風埃六月髑髏腥  
無從灞上慚劉禮  
始信遼東老管寧  
惜別恨無尊酒共  
臨溪為爾汲清泠

十二月望又自新淦泊桐江時弟銓新歿

遠營鼓角送悲酸  
十口無歸泪不乾  
孤雁哀鳴秋浦遠  
慈烏待哺夕陽殘  
江南戰骨遺民盡  
天上除書選將難  
敢望伊周明至理  
願聞韓信早登壇

和龍西雨韻寄楊和吉

權門噂沓事無干老去休文任帶寬  
狡兔經營三窟苦鷓鴣棲息一枝安  
漁樵路熟成長往鼓角風高慘不歡  
獨有西雲亭上客金錢買酒敵春寒

王進屢承徵會因寄此詩

山陰先生讀書處玄豹落日司嵒扃  
落花滿院春寂寂長松隔水風泠泠  
有時獨隱烏皮几乘興自寫黃庭經  
座上賓客日應滿不知雙眼為誰青

寄羅伯英

江湧春濤枕上聞殊鄉無伴獨離羣始知詩事能窮我  
獨喜墩名又屬君風燕入簾捎落絮雨龍歸洞駕輕雲  
遙知隣曲過從熟每日還家酒半醺

悲龍興

七載奇功一日隳眼看白旆換紅旗支祁不避旌陽劍  
絮酒誰澆孺子祠南北選材從昔異安危任事總難期  
可憐千疊西山石留刻何人節義碑

悼已

種竹經年長未齊半枯半死近窓西  
天風飄鴈隨雲沒山鬼憑狐當晝啼  
世亂獨懷徐庶母家貧久累買臣妻  
眼前事事堪腸斷欲問西山路轉迷

春懷

前水推懷後水推推愁不盡載愁來  
雪消海上蘇卿老春到江南庾信哀  
客路但聞啼鳥樂人情不及野花開  
交遊况復疎還往獨對青山勸一盃



社日

甲子頻書入短篇  
細推五戊卜春田  
讀書未有平戎策  
止酒聊輸祭社錢  
紅樹花穠春向晚  
畫橋柳暝雨如煙  
舊來歌舞今誰在  
燕子茅簷只自憐

己亥六月初五日

不惜千金一笑揮  
危途驚定始傷悲  
問安慈母翻成泣  
乞米貧交不療飢  
總謂魯連曾却敵  
謾傳李涉舊能詩  
只從鄰曲多豪客  
無怪荆吳滿戰旗

和友人別怨

風急長空舞落花，獨收殘淚暮還家。  
畫闌砌曲圍芳草，綠樹庭空噪亂鴉。  
不見韓娥沈漢水，空傳蔡琰按胡笳。  
遙知今夕天涯路，鄉夢難成月易斜。

余窮阨閭里年甚一年，風雨重傷，世味尤惡。因思去年索酒于志明，以與黃花解嘲。今年志明亦復避地，雖黃花可得見哉！感慨成詩，又無與寄，因題之壁上，以記此時情況焉。

風吹烏帽晚颼颼顛倒空尊不自謀  
賒酒隣家慚舊債  
題詩茅屋載新愁  
黑雲雨壓千山暝  
黃菊草深三逕秋  
今日鄉關最蕭索  
念君何處獨凭樓

九日和從弟銓

菊綴疎花雨滿林  
人情爭似酒盃深  
百年顛倒皆如醉  
九日荒涼不廢吟  
投暗自慚輕白壁  
知音還擬鑄黃金  
一襟愁思鵲原晚  
賴爾相從桂樹陰

和劉淵見寄二首

南國干戈積九年四年相別最相憐  
病看菱葉疑非我飢啖松花似得僊  
青鳥謾期春後到白雲不掃夜深眠  
故人半在無消息讀罷君書倍愴然

幾何歲月頭今白況復亂離生事難  
千里雁聲雲外斷一春花事雨中殘  
長年寄食貂裘敝獨夜悲歌燈火寒  
親舊江湖多阻別艱難誰與共心肝

寄郭沛

最憶山原隱士家朱簾樓外捲飛霞  
梅花清影斜侵案

韭葉寒香細入茶  
教弟舊書常共讀  
待賓新酒不須賒  
春來頓覺疎還往  
長遣歸心托暮鴉


送周宗泰之九江

花外晴雲飄白紵  
匣中秋水臥蒼龍  
揚帆直破西山雨  
把酒先招五老峯  
勝地登臨增感慨  
昔賢出處每從容  
柴桑咫尺君須到  
無數黃花秋露濃

題宋氏草庵

老大還鄉草屋新  
乾坤俯仰一閒身  
臥龍自是奇男子

歸燕還尋舊主人竹筵排墩留坐客柳塘分水過比隣  
共拚野性親魚鳥高義無多駭俗塵



靜思集卷七